



随园随笔

曾
25
5

五





增 5  
辨 25  
卷 5

隋園隨筆卷八目錄

諸子

楊子

青冢之疑

女嬰之疑

比干墓之疑

焦山周鼎

西湖壽亭侯印  
雞鳴寺鐘之訛

石鼓疑秦文公物

瘞鶴銘疑皮日休所書

古器多冒名

慶忌

二字義分而今合用

禽卽獸

牛車忽貴忽賤

猫呼老爺

痘

今疾病見古書

祝由科

六更

狐截人髮

波斯國立後

啞官

欠債失官

帝為還債

改正改朔改年

改元不始于漢文帝

齊晉之歷魯之歷

古不重望日

以月紀日

夏正或用或不用

二十四氣

上巳之說互異

無羊之月

都試之日

十時十位

正月十六日放偷

三伏

測天三家以外諸說

十三月十四月十九月

端午非必五月

上巳不定三月登高不  
必重陽除夕不必歲除

地理之難

五服

四至不同

三楊州

三曲江

徐揚可稱關中

江河發源

二百里蔡

地名通用

地名所由

三吳三解

五湖五解

臺城

雁落

兩水精宮

漢詔有四

唐詔有七

領行兼假之分

孔子非小司寇

爵官職秩之分

古無教官

唐宋銓選

勳階封號食邑實封之分

小門下

賜金紫非本秩

相國尊于丞相

尚書令尊於尚書

領錄尚書事更尊于尚書令

太史公位在丞相上

尚書侍郎古不甚尊有遷縣令者

六朝尚書臺有二書

御史有不王糾察者

署理實授

以降為尊

大學士

五馬三解

黃堂

學士

侍讀

主事是吏非官

員外

刺史

監司

郡縣忽大忽小

元知府或有或無

制府

功曹

移文

致仕官朝叅

過堂告身

未入流

領侍衛內大臣

說書

馳封非古

起居即問安

而李治不知

漢宗伯非禮部尚書

漢司空非工部尚書

宋知某縣事非縣令

京朝官之分

巡撫都統總河總漕

隨園隨筆卷八

錢唐袁 才著

仁和邵希曾 無錫賈崧 編校

諸子

商子二十六篇雖奇崛不可句讀而殿中御史之號實出是書其非孝公之世明矣晏子春秋俚淺已甚叅入孔子曾子見晏子等語尤為不倫管子龐襍非一人之筆或本文列前而解自為篇或有篇而無解其自相矛盾者如桓公十日齋戒召仲仲三觴三行而趨出又云樂飲數旬而后諫戒勿用豎刁易牙等語屢稱而屢不

同且有西施毛嬙等語年代懸隔墨子與蒞難讀既曰  
非攻矣乃有備城備水等篇既曰非儒矣乃南遊使衛  
載書甚多所染篇抄襲呂覽兼愛三篇明鬼純盜佛經  
至詆孔子爲白公尤悖漢人好敷衍湊集以成一書故  
淮南子要略一篇全用莊子大戴禮投壺哀公問曾子  
大孝篇半抄戴記保傳一篇全寫賈子投壺一篇又倣  
儀禮

楊子

法言十三篇如評子胥曰卒眼之評六國曰方肉方木

問餘耳曰光初稱文帝曰宮不女全是割裂文義測度  
猜謎讀之欲嘔末云周公以來未有如安漢公之懿尤  
屬無恥乃前見美于韓公後見美于溫公實不可解或  
云美新投閣是谷永非雄雄年七十有一卒不逮天鳳  
五年余按楊子年四十餘入京成帝方郊祀甘泉是永  
始四年次年王根秉政薦之由永始四年至天鳳五年  
計三十年楊子以四十餘入京又三十年正七十一今  
必欲諱其莽大夫之恥以爲不逮事莽乃自成帝建始  
元年數之則移楊子入京之歲在二十年前自可從而

爲之辭矣夫建始初元王鳳秉政非王根成帝並未祀  
甘泉楊子必不枯坐京師二十年以待王根之薦若谷  
永則死于王根之世有明文矣

青冢之疑

昭君青冢之說亦殊不一范史南匈奴傳載昭君入宮  
數年不得見御積怒怨因單于求女乃詣掖庭令求行  
與匈奴生三子而呼韓邪死其前闕氏子欲妻之昭君  
上書求歸成帝勅令從俗復爲後單于闕氏與西京雜  
記毛延壽畫昭君索賂之說不符前漢書匈奴傳亦云

單于長子雕陶莫臯立復妻昭君生三女卽王莽所招  
入侍者是也立雕陶時兩闕支相讓有一家共子之說  
亦稱其賢不稱其節也惟琴操言昭君爲齊國王穰之  
女端正閑麗足不窺門年十七進于宮未及見御會欲  
賜單于美人嬖越席請往後不肯妻其子吞藥自殺初  
潭集亦載之前半與范史相合而吞藥之說又與范史  
不符歸州圖經稱胡中多白草王昭君冢獨青今有人  
過其地者云亦不甚驗也

女嬃之疑

施愚山矩齋稜記極辨女嬃二字以爲屈原姊者訛也  
天有娵女星主管布帛嫁娶人間使女謂之嬃女嬃者  
有急則嬃之義故易曰歸妹以嬃呂后妹名嬃此亦義  
也屈所云云正從上文美人生端謂下賤之人見美人  
遲暮而訴厲之耳以女嬃爲原姊者誤也余按賈侍中  
云楚人呼姊曰嬃水經注引袁宏曰姊歸縣在歸州因  
屈原之姊聞弟放逐來歸而名故一名歸歸廣韻載之  
高唐賦亦有姊歸思婦之句愚山不考何耶

比干墓之疑

墨莊漫錄賈朝孺于鳳翔府破商比干墓得銅盤及古  
玉數十片上之道君皇帝以爲忠賢之墓不可掘乃退  
還其盤留玉于庫劉延仲言比干墓在衛州西山不在  
鳳翔且比干剖心而死又安得有銅玉之墓予以爲當  
是何比干之墓耳比干漢時人從鼂錯受經者雖無本  
傳而積德行善有符册之祥見西京雜記或因盤銘有  
比干二字因而相混歟

焦山周鼎西湖壽亭侯印鷓鳴寺鐘之訛

予過焦山觀周鼎篆文敝弱綠沁浮黧信其非三代物



也相傳真鼎被嚴世蕃取去而以贗者易之其信然歟  
西湖關帝廟壽亭侯印乃一粗擗頭耳非印也四方中  
空爲古飾車之物今陝中出土者動以百計玉質粗惡  
價亦不貴不知何時何人僞刻壽亭侯印四字其上按  
容齋五筆敘壽亭侯印共有三處一得之于洞庭漁者  
有一紐四環存荆門玉泉關廟中一得之于復州寶相  
院大樹下環背俱有文稱漢建安二十年壽亭侯印留  
左藏庫一邵州守黃叔啟買一紐于郡人張氏其文正  
同而無系環容齋以爲皆僞物也漢壽乃亭名旣以封

雲長不應去漢字其大又比他漢印倍之可疑也宋之  
三印尚僞况湖廟物耶相傳金陵靈谷寺有景陽鍾子  
往視之上有篆書至正七年年號可發一笑

石鼓疑秦文公物

世傳石鼓文爲周成王物又傳爲周宣王物又傳爲北  
周宇文泰物獨程綿莊以爲秦文公物也文公十六年  
敗西戎以兵七百人東獵自西垂營邑于汧渭之間其  
風有小戎之詩唐人言石鼓在陳倉野中陳倉在漢屬  
右扶風正文公所得陳寶之地其文曰公謂天子是文

公爲諸侯之詞無疑字近大篆亦合史籀所作東周文字余按程說亦本鄭夾際秦權秦斤之証獨吾鄉汪師韓太史篤信馬子卿之說以爲必是後周無疑曰武帝建德二年二月詔皇太子贊西巡太子于岐州獲白鹿以獻今考九鼓中稱鹿者四有一章而兩言之者內稱鯁鯉楊柳靈雨舫舟皆春景非冬狩也若其稱天子又稱嗣王者當是大象元二年天臺侍從之臣追紀其瑞而刻之似以天子稱武帝以嗣王稱宣帝然宣帝每自稱爲天子則當時又未必稱以嗣王也文蓋以天子稱

宣帝以嗣王稱靜帝雖宣帝卽位卽傳位與太子衍顧不稱太上皇而自稱天元皇帝是以文內天子嗣王連言之猶之周書宣帝紀內帝與皇帝連及之此數言專祖馬氏而所見亦新故附存之

瘞鶴銘疑皮日休所書

世傳瘞鶴銘爲陶貞白書又傳爲顧況書獨程南耕以爲皮日休書也云瘞鶴銘上皇山樵下增入逸少書三字乃依陳氏玉烟堂帖而僞作原文無此三字按皮日休先字逸少後字襲美見北夢瑣言有悼鶴詩云却向

人間蔡令威此痊鶴之証也又自序其詩云華亭鶴聞之舊矣今來吳以錢半千得鶴一隻養經歲而卒悼以詩陸魯望和云更向芝田爲刻銘此撰銘之証也襲美爲唐咸通八年進士崔璞守蘇辟爲軍事判官自敘以九年從北固至姑蘇咸通十三年壬辰僖宗乾符元年甲午襲美正在吳中集內與茅山廣文南陽博士詩皆不書姓字魯望有寄華陽山人詩與石刻華陽真逸上皇山樵丹陽仙尉江陰真宰諸稱謂相似故疑此銘爲日休所作

### 古器多冒名

今骨董古器多冒名之物左氏祝駝數魯之分器有夏后氏之璜是夏璜已在魯矣哀十四年宋向魍出奔公文氏攻之求夏后氏之璜豈夏后有二璜乎非冒名而何

### 慶忌

余得古玉印一方上刻成慶忌三字沁色鮮明刃法古勁考史竟無其人漢書廣川王傳王好勇衣服學爲成慶式唐人刺太子建成詩曰衣冠飾成慶玉帛禮專諸

是成慶誠勇士也然慶下少一忌字史記范雎曰成荆  
王慶忌之勇又似成荆王慶忌並非一人至儒林傳之  
闕門慶忌則并失其姓矣左氏哀公二十年吳公子慶  
忌以驟諫而殺是夫差之賢公子也安得有要離之事  
今蘇州有慶忌塔無錫有慶忌冢未知孰為公子埋骨  
處至管子稱水草之神名曰慶忌短衣小冠呼之可使  
千里寄書此又神而人名者矣不合有印

二字義分而今合用

漢書註得利曰說失利曰沒今混稱乾沒為眊入已之

稱漢書註馬傳曰置步傳曰郵今混稱置郵為驛馬之  
名詩疏外諸侯曰君內諸侯曰長猶之漢官制萬戶以  
上稱令不及萬戶稱長也今混稱令長君長為長吏之  
名說文堪天道也輿地道也今混稱堪輿為地理之名  
楚世家為火正者一吳回一陸終父子也今混稱回陸  
火正為重黎左氏曰重為少昊氏叔黎為顓頊氏子亦  
二人也今混稱重黎漢制郡國曰學侯國曰校今混稱  
學校禮運仕于公曰臣仕于家曰僕今混稱臣僕演繁  
露閣夾室也度食之所閣門旁小戶也脚門也今混稱

閣下尸子註婦女曰姑兒童曰息今混稱姑息緯略有  
聲曰雷無聲曰霆雷善而霆惡今混稱雷霆周官冢人  
註邱封之度王公曰邱諸侯曰封今混稱邱封公羊註  
側手爲膚按指爲寸投壺註舖四指曰膚大戴禮布指  
曰寸今混稱膚寸爲些小之名何休公羊註同門曰朋  
同志曰友今混稱朋友爲交好之名佛經木覺曰如今  
覺曰來今混以如來爲佛號考工記青襟曰謂之女赤  
襟曰謂之章今混以章句爲文章他若禮記疏一舉足  
曰跬二舉足曰步字少曰名字多曰字男幼曰嬰女幼

曰兒能知姓氏所出者爲宗能知明神之事者爲祝有  
才能者爲奚無才能者曰奴太史公功臣表明其等曰  
闕積其功曰閱說文貪財曰饕貪食曰饕有足曰虫無  
足曰豸爾雅註平底曰履複底曰舄詩疏下田曰汚上  
田曰萊穀曰倉米曰廩國語註東西曰廣南北曰袤儀  
禮下獻上曰享上食下曰饗爾雅鬻妻父曰昏婿父曰  
姻周禮春官小史註先王死曰忌名曰諱地理志江  
南曰雲江北曰夢論語疏一穀不收曰饑五穀不收曰  
饑金食貨志官田曰租私田曰稅陸德明義疏三糾繩

曰徽二糾繩曰纒庶物異名疏戶限曰樞弩牙曰机小  
曰羔大曰羊劉向洪範五行傳記內曰恭外曰敬初學  
記顏色均衆寡曰沉閉門飲曰酒鄭衆解詁玉曰琢石  
曰磨有目朕曰矇無目朕曰瞽裳曰要衣曰領爾雅內  
宗曰族母妻曰黨女曰巫男曰覲杜預曰黍稷曰粢在  
器曰盛婦之父曰昏重昏曰媾國史補上告下曰臚下  
告上曰句菜不熟曰饑果不熟曰荒宋史儀衛志文曰  
儀武曰衛亦有兩字各義而今混用爲一義者爛漫水  
火之象也契濶離合之情也憂虞悲喜之別也榻來去

來之異也他如軒輕依違然疑淹速皆兼二義而今人  
皆以一義用之然妻子二字古竟有作一義用者樂府  
結髮爲妻子妻可云結髮子不可云結髮也韓非子卜  
子使妻爲禡妻問今禡何如曰如故禡妻子遂毀新禡  
爲故禡是以妻子爲稱妻之名號矣

禽卽獸

古人于禽獸二字不甚分明書稱外作禽荒禽者獵獸  
之稱易稱卽鹿无虞以從禽也以鹿爲禽周禮大宗伯  
以禽作六贄有虎皮豹皮亦以獸爲禽賈公彥疏已孕

陸國陶筆  
卷八  
一  
曰獸未孕曰禽直合而爲一矣禽以雌雄名而左氏稱龍一雌死則獸亦可稱雌雄獸以牝牡稱而書稱牝雞之晨則禽亦可稱牝牡

### 牛車忽貴忽賤

漢書言天子貧不能具鈞駟將相或乘牛車是言牛車之賤也晉太宰王導好乘牛車石崇王濟所乘牛名八百里駿隋牛宏弟射殺其車牛宋書陳顯達傳當時快牛稱陳世子青牛王三郎烏牛呂文顯折角牛是牛車又貴重矣

### 猫呼老爺

劉若愚宮中秘典云宮中所畜之猫俱有品級上有野老爺其次稱了頭然太監稱皇帝亦稱老爺如云我太祖高皇帝老爺我成祖文皇帝老爺之類

### 痘

小兒痘症古醫書岐黃素問皆無之左傳史記好言人狀貌而亦不言及面麻二字李時珍以爲始于馬援征武溪蠻染此疾歸名曰虜瘡不名痘也予攷之史傳惟文苑英華載陳黯幼時面瘡初脫見清源牧咏河陽花

牧戲之曰藻才而花貌胡不咏之黯應聲曰玳瑁應難  
比班犀定不加天嫌未端正滿面與粧花似屬痘見文  
字之始

今疾病見古書

考今疾病之見於古者鄭康成曰湯半體枯即今之半  
肢風也荀子曰徐偃王目可瞻焉鳥之微者即今之近  
視也孫叔敖突秃即今之髮禿也左氏晉侯張如廁即  
今之膨脹崔令欽教坊記范漢女開元內出庭有姿而  
微慍羝即今之狐臭也素問淡陰之疾即今之痰飲也

周禮春時有瘖首疾即說文之酸瘖頭痛也子雲有離  
眴之疾即今之怔忡也左傳稱深豹望視今之望羊眼  
也趙羅疔作而伏今之瘡疾也荀偃生瘍於頭今之落  
頭疽也史記樊荒侯不能為人今之天關也韓女腰痛  
淳于意以為欲男子而不得即今之相思瘵也論衡言  
周公背僂即今之背彎也孔子反羽即今之反唇也荀  
子言傳說如植鱗即今之枯瘦也伊尹如斷菑亦枯瘦  
之義

祝由科



今有祝由能以符呪治病見南史薛伯宗從癰樹上爲  
祝由科見經傳之始

### 六更

楊誠齋詩天上歸來已六更人多不解蓋宋忌五更之  
識故改作六更而不知五更者乃五庚申之謂非夜之  
五更也宋大內五更已絕則擲鼓遍作號曰蝦蟆更亦  
號六更其時禁門開而百官集如方外之攢點今之發  
擗是也周禮三鼙以號戒司馬法曰昏四通爲大鼙夜  
半三通爲晨戒旦明五通爲發煦然則發煦鼙戒與元

帝摘銅丸中嚴鼓之節張衡賦所用之楚嚴皆今之發  
擗也

### 狐截人髮

魏書靈徵志太和元年狐截人髮靈太后召而鞭之有  
蠶蛾喫人百十人殊不可解

### 波斯國立後

波斯國立世子書其名密封庫中見隋書

### 啞官

古聾盲有仕者絕無啞官獨宋史楊信以病瘖而歷仕

至十七年自建隆二年至太平興國二年瘖忽愈太宗  
喜遽幸其第次日死信有奴田玉能揣其意信有所指  
揮必顧玉書掌爲字玉能達其意雖奏事亦無舛也

欠債失官

居官負債漢書孝文三年河陽侯陳信坐不償人責過  
六月免李晟子基貸回紇錢一萬貫不償貶爲定州司  
戶叅軍

帝爲還債

宋史李沆貧時欠人錢三十萬登第後帝爲還之故宋

人詩云新祠民祭祀舊債帝償還

改正改朔改年

或疑商人以丑爲正既書元祀則必書其歲首之月萬  
充宗以爲商書伊訓之十有二月朔實子月也崩年改  
元商制本不同于周制先儒謂商改正朔而不改月數  
者非也夏建寅商建丑是改正也夏朔以平旦商朔以  
雞鳴周朔以夜半是改朔也秦建亥而仍曰冬十月是  
改年也

改元不始于漢文帝

通鑑

五

人以改元始于漢文帝聽辛垣平不知僞武成以虞芮質成之年爲文王受命改元之年史記秦惠文君十四年更爲元年竹書紀年魏惠王有後元年商書惟元祀十有二月乙丑朔伊尹祠於先王疑是湯崩不踰年而改元之証也余按改元之制古無一定唐虞終三年喪舜禹皆行之而踰年卽位者周也然漢人亦不甚重之故列侯皆自稱元年功臣表稱平陽侯曹參元年諸侯王表稱楚王戊二十一年是侯王亦有改元之制不以爲嫌也後世惑長生之說乃縮去其已往之年而爲更

新之號竟有以四字改元三字改元者如唐之天册萬歲魏之太平真君梁之中大通中大同是矣

齊秦之歷魯之歷

管子三卯三暑三寒之令齊歷也呂氏春秋月令未行之秦歷也汲冢周書時訓解魏歷也周之分至未嘗係之以時獨大司樂有冬至夏至之名故萬充宗深以周官爲僞漢高八年楚元王之三年也律歷志中不書漢年反書楚年全謝山以爲此必劉歆之文蓋周歷之後有魯歷以魯紀年劉爲楚元後故倣其例以楚紀

年

古不重望日

玉藻天子朔食太牢諸侯朔食少牢不言望日之食喪禮朔有殷奠月半不殷奠是直指望日之不重也周官冢宰司徒懸法于象魏亦只用朔日論語吉月必朝服而朝註吉月月朔也六經明文無重望日者惟鄭康成註月半不殷奠乃云大夫以上仍有月半之奠士降則無其殆非古經之旨乎夫月者日之配也古人扶陽而抑陰故祭義曰祭日于東祭月于西于月貴其明之始

生而不貴其魄之已兆又易象言月幾望者三望而曰幾殆有無取其滿而戒其已滿之義冬至受賀而夏至不受賀蓋亦貴陽而賤陰之義歟

以月紀日

古史以月之盈虧紀日者惟尚書武成有旁死魄哉生明之詞召誥有二月既望三月惟丙午朏顧命惟四月哉生魄畢命六月庚午朏

夏正或用或不用

幽風七月以后稷先公皆夏時臣故從夏正而避十一

月十二月之名則曰一之日二之日然先儒以爲商周改朔不過朝覲聘問耳其他總以夏正爲主左氏伐虢童謠絳縣老人語可驗詩曰四月維夏六月徂暑皆周用夏正之証也孟子曰七八月之間旱春秋二月無冰正月日南至申須曰火出于夏爲三月于商爲四月皆周不用夏正之証也元吳草廬云春王正月者明其爲周王之正月耳其時他國必別有所謂正月也明周洪謨云周以十一月爲歲首非以爲正月也商之建丑也曰惟元祀十有二月朔稱元祀仍稱十二月不稱正月

秦之建亥也亦曰元年冬十月不稱正月一爲史官紀年一爲歷官紀年余按論語子張問十世註神農以十一月爲正女媧以十二月爲正何晏此說不知何所考而漢武帝後魏明帝景和元年建丑唐武后建子肅宗上元二年建子蓋亦不專從夏矣

### 二十四氣

歷中二十四氣萬充宗以爲始于漢之大初歷蓋二十四氣在夏正則安在周正則戾隋書後齊神武霸府田曹參軍信都芳深有巧思能以管侯氣仰觀雲色嘗與

人對語卽指天曰孟春之氣至矣人往驗管而飛灰已應每月所候言皆無爽又爲輪扇二十四埋地中以測二十四氣每一氣感一扇自動他扇并佳與灰管相應若符契焉周書序周公辨二十四氣之應以明天時作時訓唐大衍歷議七十二候原于周公時訓月令雖頗有增益然先後之次則同自後魏始載于歷

上巳之說互異

癸辛禊記上巳當作上巳謂古人用日例以十干恐上旬無巳日毛西河云巳字一字三讀非有三形巳之缺

左巳之缺右偶爲表記則然耳吳才老謂辰巳之巳亦讀以古人卜日用干數日用支故三正建月爰定子丑四時分日乃用甲乙禮上丁習舞仲丁習樂傳上辛大雩季辛又雩皆其証也宋書曰自宋以後祓禊但用三日不用巳日以常常上旬朔在午未則此一旬已無辰巳故也謝氏五雜俎則云西京雜記正月以上辰三月以上巳其文甚明已劉熙釋名訓作正謂陽氣之止于巳也故巳卽巳也但不可以支爲干耳日知錄亦云辰爲建巳爲除故三月上巳祓除不祥三代以上重于如

易稱先庚先甲詩稱吉日惟戊是也三代以下重支如漢書之吉日剛郊蘭亭之三月上巳是也潛邨劄記亦云蘭亭三月三日乃丙辰次日丁巳

無羊之月

筭命書以寅午戌三月為無羊之月以宋制官員于此三月例減祿料故曰無羊

都試之日

漢以九月為都試日太守都尉共課最之日也集生徒講授則曰大都試

十時十位

叔孫穆子生卜楚邨之爻詞曰日之數十故有十時亦當十位杜註日中當王食時當公平旦為卿雞鳴為士夜半為皂人定為輿黃昏為隸日入為僚晡時為僕日昃為臺

正月十六日放偷

金俗正月十六日許人偷盜雖犯不禁每逢是日家家謹防妻女致撻撻偷其叔母兀室怒乃杖之

三伏

陔餘叢考 卷八  
史記秦德公二年初伏註三伏始于秦周無伏也劉熙  
釋名云金氣伏藏也故三伏皆庚王大可云三伏者庚  
金伏于夏火之下也金畏火故曰伏

測天三家以外諸說

測天者宣夜渾天昕天三家人皆知之今用西洋法則  
亦渾天遺意也然三家外散見各家論天地有極奇者  
唐書太宗收骨利幹其地夜短煮羊脾未熟天即明元  
史沙彌國日人時其聲洶湧國人必擊金鼓以亂之否  
則小兒怖死上哈國日人不滿一時隨即出地宋戴五

原云嘗登崆峒之巔見日光非從海出人也太陽之氣  
朝則聚聚極而圓明暮則散散盡而昏黑日聚日散人  
離日遠故悞以其散聚為穿地而過耳癸辛襍記云趙  
都統見海神黃衣赤眼以頭頂日而上日漸高人漸小  
本朝懷氏坤輿外記云莫斯歌國其地夜長晝短冬至  
之時太陽出止二時而夜矣季氏臺灣雜記云臺灣東  
有紅夷國中國商人某舟泊其地竟無晝夜花木明秀  
商大喜以為仙境乃留二百人裹糧居之隔年復至則  
山中黑如長夜人迹已經取火照之見壁上留字云此



國至秋而暮至春而且以一年爲晝夜也王方平云月  
至梁時已周圍減寸矣自開闢至唐虞已減一寸郭守  
敬云古日舒長今日促每百年則短一分孫太初云今  
日不如古日之熱也

十三月十四月十九月

陳寵傳十三月陽氣已至牛宏傳十三月不以太族爲  
宮便是春水不旺註十三月正月也金石錄古公緘鼎  
有十四月戊命尊有十九月歐公問貢父而不知王鳳  
洲以爲閏月也是齋日記以爲嗣王卽位雖踰年不忍

改元也汪師退作史記十表言秦漢之際陳涉起陳凡  
六月武臣起趙凡四月皆繫以月而不年而其中有四  
十八月三十八月何以不年其時統無所屬不得以正  
元起數故也故管子亦有二十四月之文此說出而十  
四月十九月之說可以明矣

端午非必五月上已不定三月登高不必重陽除  
夕不必歲除

唐宋廣平賀表曰時則仲秋日惟端午是端午不必在  
五月也劉楨魯都賦素秋二節天漢指隅人胥被除其

時蓋七月十四日漢書八月帝與羣臣被于灞上是上已非必三月也隋書文帝七月與羣臣登高是登高不必重陽也太平廣記盧頊傳是日冬至除夜盧家備粢盛之具是冬至夜亦名除夕也老學菴筆記冬至前一日名為冬住亦奇

地理之難

地理之學極難閻百詩云代有四遷寧人知其三江西有三寧人知其二寧人以幽并營三州在禹貢九州之外而百詩又引周禮職方氏所載駁之如昭餘祈在今

介休縣肅慎氏在今寧古塔之類牧齋註杜以潼關為唐始立而竟忘曹操之殆死潼關則真乃日不見曉耶方密之通雅載石頭城非石城龍門棧道均非一處有漢之河東唐之河東周之河內漢之河內皆不同處

五服

禹貢五服周職方九服蓋就賦役之繁簡王畿之遠近因時制宜畧有損益其實山川數澤為不可移易之物非商周異于虞夏也鄭康成以為服五百里是堯之舊制禹弼之更增五百里面五千里相距為方萬里其說

甚誕按王制云四海之內斷長補短方三千里原有明文而孔疏引地理志言漢之土境東西九千三百三里南北萬三千三百六十八里其所以與九服五服之面五千里俱不合者蓋尚書所言乃據其虛空鳥路方直而計之漢書所言乃是著地人迹屈曲而量所以其數不同此說尤誕夫虛空鳥路非鳥不知三代之人非著翅解飛者何能憑空丈量而臆斷爲五千里哉其實幅員之廣三代實不如秦漢也再考唐虞之時雍州之地猶爲導河導弱所經冀州之北并無治水之迹此二方

者有何侯衛之可設貢賦之可稽乎且依其說則王者之都必長在天下之中如嵩洛汝潁地方然後均齊方正而五服九服可以環而向之若虞夏之都偏于北周人之都偏于西其北則沙漠苦寒西則戎狄流沙又安得有五千里之侯衛耶至于東南二面又豈止于五千里耶

#### 四至不同

四至之說不同爾雅云東至泰遠西至邠國南至濮鈇北至祝栗呂覽則云東至搏水之地西至三危之山南

至績構之國北至夏海之窮大戴禮則云北至幽陵南至交趾西至流沙東至蟠木

### 三揚州

漢以揚州屬徐州今之壽春也杜詩之何遜在揚州蓋指爲建安王詔室時今之金陵也隋開皇九年改梁之南兖州爲揚州置總管則今之江都矣禹貢揚州之域所統甚廣晉書隋書均以交廣爲禹貢揚州杜佑非之以三代時尚無南越而不知堯典之宅南交卽交趾也故史遷舜本記有北發息壤南撫交趾之語至于北朝所僑置之揚州則更紛攪矣

### 三曲江

曲江有三枚乘七發觀于廣陵之曲江今浙江也廣東有曲江今韶州也司馬相如弔二世賦臨曲江之墜州今長安也曾鞏鑑湖圖有所謂廣陵斗門者在今山陰縣西六十里江都更名廣陵在元狩三年其時枚乘已卒不應見之于文至元年間試羅利江賦獨錢惟善以錢塘江爲曲江遂冠三千人之上見升菴外集

### 徐揚可稱閩中

今閩中爲福建然傳亮從武帝平閩中詩曰鞠旅揚城  
大蒐徐方是徐揚亦可言閩中梁元帝去丹陽尹荊州  
詩曰分符蒞閩越終然漸厲精是荊州亦稱閩越華陽  
國志稱哀牢歸義其地東西三千里有穿胸儋耳閩越  
云云是今之雲南亦古之閩越也

### 江河發源

禹貢有岷山道江之文而後之論水者遂以岷山爲江  
源桑經鄭註皆主其說自前明徐霞客好遊直至崑崙  
見河與江皆出自崑崙不過河源在北江源在南耳岷

山者乃其入中國之始而非其發源也有以北金沙江  
爲江源者其源在西番境內莫得其詳李穆堂以康熙  
方輿圖考之岷江與金沙江會合于四川之敘州自敘  
州逆而數之直發源于西番之阿克達母必拉等處蓋  
六千九百里而後至岷山幾與黃河同源徐楚金作說  
文繫傳言河出崑崙崑崙神靈之宅帝之下都非造次  
可觀蓋在元以前未窮河源到星宿海處故也豈大禹  
之力不如一元人哉天地之鑰必至此而始開也沈括  
筆談云温州雁宕山前人未見故謝靈運爲太守未曾

一遊至宋真宗修昭應宮采木入山此境始露于外可知天下境界無窮學問之道亦然安見前人言之而後人不可再置一說耶

二百里蔡

二百里蔡孔傳以為殺滅其稅二百里流為流移而隨其俗蔡傳俱以為罪名愚意孔說為是唐虞以流宥五刑似流為最輕之罪安得流諸荒服之外故曰流共二于幽州幽州非荒服也

地名通用

蕢聞楚地也見戰國策而今以為貢院試士之所九京晉地也在京陵縣見水經註今以為死者九泉之通稱太原平陽地之通稱也見孔傳而今以為山西之首府陝西之平涼府杏壇澤中高處之通稱也見司馬彪注莊子今指定為孔子講禮之所蠶室魯地也見左氏哀公八年吳伐魯舍于蠶室後人以為宮刑之所

地名所由

虎牢者穆天子傳七萃之士禽虎而獻之天子天子命為押畜之東虞是名虎牢餘于者梁武時童謠王氣在

三餘乃置餘干縣金山者唐有僧獲金江中因而建寺  
猶之始皇埋金建業故名金陵也俱見九域志任昉述  
異記云吳人賣瓜于江畔故曰瓜步水際曰步湘中有  
靈妃步是也句容山形曲而有容故曰句容見真誥望  
都者謂登堯山望見都也見地理志邯鄲盡也言邯  
山至此而盡也見寰宇記陽關者漢將陽興敗逃北  
關故曰陽關見清波雜志太湖得咸池五車之氣故曰  
五湖見陸魯望集漢封真人匡俗爲越廬君以其所廬  
處故也後遂名其山爲廬山與焦山之名因焦先所居

同義匡字君孝見杜陽雜編漢書朱儵傳註引錢唐記  
云杭州郡議曹華信築塘每土石一石與一錢不崇朝  
而集故曰錢塘宋王存引之以爲華氏私錢所築世說  
以爲沈信所築也良常者秦始皇曰巡狩之樂莫如山  
海自今以往良爲常也餘杭者禹杭之訛杭舟也言大  
禹至此舍車而登杭也見地理音釋奔牛者言梁武帝  
掘鍾山得一僧于龕中僵坐不動寶志公曰此入定僧  
也可以磬醒之遂起而走逐之至丹陽四十里化爲牛  
奔去見白醉瑣言會稽者禹王至此朝諸侯會計天下

之財幣故曰會稽見咸淳臨安志孔廟東南有雙石闕  
故名闕里見水經註彭祖二子長曰武次曰夷所居山  
遂名武夷見通雅

三吳三解

通典漢分會稽吳興丹陽爲三吳水經以吳興吳郡會  
稽爲二吳指掌圖以蘇州常州湖州爲三吳

五湖五解

虞翻以太湖通五道故號五湖其實一湖也猶之昭餘  
所雖名九澤其實一澤也然水經五湖有長塘湖射湖  
貴湖上湖瀾湖六湖之分吳越春秋又有貢湖游湖青  
湖梅梁湖金鼎湖之分韋昭以胥蠡洮瀾四湖及其區  
爲五湖合之陸魯望所言是五解矣

臺城

六朝朝廷以禁省爲臺故稱官軍爲臺軍禁城爲臺城  
法令爲臺格使者爲臺使猶之晉并州刺史治太城蜀  
太守治少城便稱太城少城云爾

雁塔

佛家三靜食雁也犢也鹿也永徽二年元奘僧造塔于



宮城南見雁飛曰衆僧缺供一雁應聲而墜衆曰此雁捨身宜旌彼德遂不食三靜而瘞此雁名曰雁塔題名者僧道士庶皆有之不止進士也見震澤長語

### 兩水精宮

闔廬造水精宮見述異記卽今之蘇州也後楊僕守湖州詩有清光合作水晶宮之句後此湖州亦稱水晶宮

### 漢詔有四

漢皇帝下書有四一曰策書長二尺短者半之免三公用之蓋用尺一木而兩行書之也二曰制書三公用璽

尚書加印露布州郡三曰詔書如告豫州刺史馮煥是也四曰誡勅其文曰有詔勅某官云云金石錄言之甚詳又臣上書不稱姓惟拜鮑顯爲司隸使稱姓曰俾知忠臣有後詔惟赦贖露封餘俱尚書令重封

### 唐詔有七

唐世王言之制有七一册書次制書次勞慰次册書勅惟除拜公卿用之白麻紙書封付閣門集朝士拆之宣讀畢擇日備禮以付其人自制書以下皆用黃麻紙老杜詩黃麻似六經是也見六典石林燕語又言唐中書

制詔有四封拜冊書用簡以竹爲之畫旨而施行者曰  
發曰勅用黃麻紙承旨而行者曰勅牒用黃藤紙赦書  
用絹黃紙始正觀間取其不蠹也紙以麻爲上藤次之  
用此爲重輕之辨學士制不自中書出故獨用白麻紙  
而已因謂之白麻今制不復以紙爲辨號爲白麻者亦  
池州楮紙耳曰發曰勅蓋今手詔之類而勅牒乃尚書  
省牒其紙皆一等也

領行兼假之分

漢官以上兼下曰領霍光以大將軍領尚書事是也以  
下攝上曰行韓安國以御史大夫行丞相事是也以本  
官任他職曰兼常惠以右將軍兼典屬國是也晉書曰  
假趙充國爲假軍司馬是也

孔子非小司寇

崔靈恩曰孔子爲魯司寇乃小司寇也侯國無大稱又  
有臧武仲爲司寇則夫子非大司寇可知本朝閻百詩  
主其說馮山公駁之云左氏晉士薦爲大司空宋戰于  
泓有大司馬固諫安得謂侯國無大字耶夫子是命卿  
非止大夫王制次國三卿一卿命于天子下卿命于其

君魯爲次國其君可以命卿公子疊求爲太宰夏父弗  
忌爲宗伯是也安見孔子之必爲小司寇耶

爵官職秩之分

爵者公侯伯子男也官者宰也尚書也職者一品至九  
品也秩者光祿大夫至文林郎也俸之深淺曰秩

古無教官

古有大司成大司樂主教士之具其庠序學校之在鄉  
者其師皆致仕之大夫歸老于鄉者爲之教授不別立  
官有類今之掌教書院者是也以人校官碑所稱潘君

諱乾字元卓者先佐上郡再除曲阿尉以其能興文教  
而歌誦之非今之教官也宋慶歷始命天下小州小縣  
皆立學而設官以教焉朱子記漳州教授廳云官雖有  
統而其任之本諸身者非期會簿書之可考上之人又  
以其儒官而優容之故仕者反利焉

唐宋銓選

唐選官有小選東選南選之分小選者凡流外兵料禮  
部舉人得自主之東選者應選之人集于洛陽就近銓  
選南選者因嶺南黔中太遠遣郎官御史爲選補使至

其地選之其州縣官亦不由吏部選授聽彼處都督辟士人而用之宋神宗八年詔川陝間廣八路之人免其赴選令轉運司立格就註而已皆爲體恤遠人之意

勲階封號食邑實封之分

宋加贈大臣有勲階封號之分如程琳碑階者贈太師尚書令累階開府儀同三司是也勲者上柱國廣平郡公是也封者封七千四百戶是也賜號者賜推誠保德守正翊戴功臣是也餘皆倣此有食邑與實封有別者如余襄公食邑二千六百戶實封二百戶是也唐之實

封可以食其租稅至宋皆爲虛名封號起于唐明皇與肅宗德宗如賜號開元功臣實應功臣之類

小門下

六朝呼侍中爲門下省故給事黃門侍郎呼小門下

賜金紫非本秩

光祿大夫銀印青綬南齊樂安任遐爲光祿大夫向王晏乞一片金晏爲啟上賜金紫所云賜者非其本秩應有之章服也故凡書賜紫金袋及賜銀青賜緋者皆沿此例

相國尊于丞相

吳仁傑兩漢刊誤補遺言百官表蕭何爲丞相七年遷爲相國何傳又言使拜丞相爲相國史記秦惠王拜張儀爲相又以樛里疾甘茂爲左右丞相是丞相者佐相國之名相國尊于丞相也

尚書令尊于尚書

東漢百官志尚書令千石且云在孝武時宦者職耳成帝才用士人故勵堪以尚書令陞光祿卿在漢時原不甚尊六朝其職漸重唐六典尚書令正二品六尚書其

屬也皆三品又置左丞相一人右丞相一人從二品是尚書令尊在丞相之上卽秦漢之相國也淳化三年詔升尚書令在三師之上大臣薨而贈尚書令者必兼他官惟韓魏公獨得單贈此其証也至于正一品者止司徒司空太尉皆贈官耳或以太師致仕或以太尉致仕或死後加贈如其起用則反落免之如元豐元年文彥博落太師致仕平章軍國重事

領錄尚書事更尊于尚書令

漢武時霍光領尚書事章帝時以太傅趙熹太尉牟融

并錄尚書事尚書有錄名自嘉融始蓋卽虞舜大麓之職也和帝時太尉鄧彪以太傅錄尚書事位上公在三公之上每少帝立則置此官循古冢宰總已之義也隋書錄尚書一人位在尚書令之上

太史公位在丞相上

衛宏漢儀注以太史公位在丞相上天下記書先上太史公云云晉灼非之以爲百表所無也史遷亦自謂先人文史星歷近乎卜祝之間則位在丞相上之說可疑于文定公以爲位者朝著之位非爵位也如唐宋螭頭

記注之制在人主左右耳故不見于百官表而見于儀注也

尚書侍郎古不甚尊有遷縣令者

周官司會康成注云若今尚書矣秦世少府遣吏四人在殿中主發書故謂之尚書尚者主也漢有尚衣尚冠尚浴尚席尚書謂之六尚官六人俸六百石李固有北斗喉舌之稱以其出納王命故耳官不甚尊非今之所謂尚書也以六曹尚書當周之六官始于武后光宅元年以天地四時分六部故通典已有六部之條侍郎乃

掌守門戶之名有儀郎侍郎中郎郎中之分比四百石  
蔡質漢儀曰尚書郎初從三署詣臺試箋奏初上臺稱  
守尚書郎中歲滿稱尚書郎三年稱侍郎揚雄爲侍郎  
乃三署郎非尚書郎也恰從此員推升侍郎五年遷大  
縣令尚書郎只五品初以令史久缺補之光武參用孝  
廉故丁邯寧受杖不肯補郎恥以孝廉補令史之職故  
也西漢侍郎千餘人東漢三十六人一尚書領六郎光  
武時尚書之權已重所謂不任三公事歸臺閣者章懷  
太子注云臺閣謂尚書也其後以侍郎貳尚書亦自唐

始

六朝尚書臺有二書

六朝宋齊之間尚書臺文檄有二體召人用虎爪書告  
下用偃波書取其不能倉猝成書所以防奸也

御史有不主糾察者

監察御史主糾察而侍御史則是周之柱史主藏書冊  
老聃曾爲此官非糾察官也後世有給事中之名而不  
司宮禁有司馬之名而不司兵有太常之名而不司音  
樂

署理實授

今官有署理實授之分其來最久楚漢春秋曰會稽假守殷通項梁所殺者漢書王詵作扶風令宮館馳道修治天子喜拜詵卽真然則其初固署也至于調繁調簡亦始于漢薛宣傳稱以平陵之薛恭易鉅鹿之尹賞蓋亦繁簡對調

以降爲尊

杜詩解大司馬三遷爲侍御史安集洛陽以狀聞世祖賜榮戟往河東剪滅諸賊乃拜成臯令陸遜爲大將軍

立功後孫權欲其出身之正乃使鄉里重辟舉爲秀才二事極相類皆以降爲尊寵

大學士

李泌傳肅宗加集賢殿崇文館大學士泌言學士加大始于張說已不敢當乃以學士知院事至崔圓加大學士而引泌爲辭宋設集賢院大學士一人以宰相充之丁謂爲資政殿學士在翰林學士下帝乃加大字班承旨上然則大學士之尊久矣

五馬三解



漢官儀四馬載車此常禮也惟太守出則增一馬故稱曰五馬此一說也程氏演繁露以爲五馬未詳所出疑始于毛詩良馬五之鄭註周禮州長建旗漢太守比州長御五馬云云樂府曰五馬立踟躕白香山曰五疋鳴珂馬雙輪畫戟車此一說也余按南史柳元筵傳兄弟五人同爲太守各乘一馬出入時人榮之號柳氏門庭五馬委地此又一說也

### 黃堂

黃堂二字見東漢書郭丹傳註太守之廳也郡國志曰雞坡之側黃歇假居之地屢有火災太守塗雌黃以厭之故曰黃堂

### 學士

蕭梁有壽光殿學士之號爲學士之始中宗采上官婉兒之言設宏文館學士親近陪宴以至權重于宰相李鄴侯陸宣公皆爲之明洪武初仿宋殿閣學士之制設華蓋殿學士等名不過五品備顧問而已自胡維庸作相敗後屢召學士解縉等咨詢而權遂重永樂時至加師保

侍讀

唐明皇無人問古盧懷慎薦馬懷素為侍讀此侍讀二字見史傳之始

主事是吏非官

或問黃梨洲宋官名有某部主事否梨洲云宋制六部自尚書以下只有侍郎郎中員外郎三項其主事錄事令史書令史皆吏也而非官凡三省樞密皆有之不獨六部也日知錄曰主事始于後漢光祿勳有南北庭主事其職掾史也隋有主事令史員

員外

唐書李嶠為吏部欲市私惠置員外官數十人

刺史

古刺史一官最為不倫忽輕忽重大抵漢之刺史以六百石而糾二千石居無定所似明之巡按也魏晉刺史統轄數州兼領軍務似今之總督也隋書刺史則今之知府知州也

監司

監司二字始于徐邈與范甯善擇公方之人以為監司

見晉書

郡縣忽大忽小

三代縣大而郡小故曰上大夫受縣下大夫受郡又曰縣有四郡戰國縣小而郡大甘茂曰宜陽大縣其實郡也晉制不宰縣者不得入爲臺郎任至重也北魏以厮役爲之士人不屑元文遙力除此弊乃集于神武門唱名慰諭之宋寧宗慶元年間詔改官必作令謂之須入除殿試三名外雖宰相子無不宰邑邑令又重矣唐語林以得縣會爲入畜生道以得學博爲入餓鬼道豈非

忽大忽小之証歟

元知府或有或無

或問黃梨洲元官名有某府知府否曰元制諸路設總管府達魯花赤之下爲總管總管下爲同知治中判官散府則達魯花赤之下置知府或府尹若揚州杭州皆爲上路有總管而無知府所謂達魯花赤者國言荷包壓口取管轄之義稱州達魯花赤曰監州縣達魯花赤曰監縣

制府

今稱總督爲制府制府二字見宋史李全傳中以宋有  
安撫制置使之官故有制府制置之稱許國爲此官命  
全參謁全曰不參制府則曰在我幕府章夢先亦令隔  
簾貌喏貌喏者大槩今之請安也

### 功曹

劉貢父言蕭何不爲功曹而子美有功曹非復漢蕭何  
之句按漢書本無何爲功曹之語三國志虞翻爲策功  
曹策曰孤有征討事未得還府卿復以功曹爲吾簞何  
守會稽耳此子美所用也時子美在梓州補京兆府功

曹

### 移文

今文書平衡者號移文初見三國志王肅傳薛夏爲秘  
書丞以公事移蘭臺蘭臺自以爲臺也而秘書署耳謂  
不得用移文夏報曰蘭臺爲外臺秘書爲內閣臺閣一  
也何不可移之有事物紀原以移文爲始于劉歆移太  
常博士予按左氏王子朝之亂晉命諸侯輸周粟宋樂  
大心不肯士文伯折之乃受牒而歸所謂牒者卽今之  
移文也

禮記

卷八

四

致仕官朝參

貞觀二年特詔致仕官朝參在本品現任官之上

過堂告身

唐三銓三注三唱而后予官季春始畢乃過門下省即今之過堂也唐告身即今之告勅天寶初官爵濫而米粟貴所以有將軍告身易一醉之語顏魯公自書告身余于尹文端公處猶及見之

未人流

唐時流外即今之未人流張元素流外出身故被太宗

問出身而自覺慙恧面如死灰黃旆綽見醉人臥池側告文宗曰此令史也問何以知之曰再一轉便人流文宗大笑通考唐時每歲進士明經出身者不過百餘人流外二千餘人

大領侍衛內大臣

元有官名都赤者侍衛最親雖宰相見無此人侍立不敢見即今之領侍衛內大臣也

說書

今之說演義小說者稱說書賤人所為如左寧南門下

柳敬亭是也不知宋金元皆有崇政殿說書之官其職有類經筵講官而秩稍卑程伊川楊龜山游酢皆爲此官

禮夫尊于朝妻貴于室爵不上達也自南北朝始有封贈其祖父之例而自父以上官以差殺未如近制之隆

郭令公二十四考中書令而父止贈太保權文公官宰相而其祖止贈郡中漢置武功爵官首補吏與今例異相似然爵僅止得第八級樂卿止耳說見姜西溟張主

事墓志

起居卽問安而李涪不知

唐李涪刊誤稱今謁尊者稱祇侯起居起居者指動止而言近有稱起居某官者其義安在殊不知漢書王莽使人起居太后是作問安之義稱起居某官者非誤也

漢宗伯非禮部尚書

平帝元始五年詔宗室有寃者得因宗伯以聞晉灼曰是宗正也非大宗伯也

漢司空非工部尚書

陳咸傳咸為南陽太守犯法者輒論輸府以律程作司空師古註司空主行役之官也非大司空也余按儀禮大夫之家有司馬司寇其卽此義歟

宋知某縣事非縣令

宋大縣千戶以上選朝官知小縣三千戶以下選京官知蓋以京朝之銜知其縣非外吏也縣令則古長吏之職如歐公之貶夷陵令是也見續考通

京朝官之分

嘗不解宋官制有京朝官之分後閱王得臣塵史云宋

進士出身為著作左郎餘人為大理寺丞者曰京官若左郎再遷秘書丞寺丞再遷太子中舍曰朝官便奉朝請選人作令曰某縣令京官以上曰知某縣事

巡撫都統總河總漕

巡撫二字始見晉咸寧中詔劉頌巡撫荆揚唐高宗以薛元超為河北道大使分道巡撫都統之名始于晉書苻堅以秦洲主簿趙盛之為少府都統總漕之名始于明太祖之命吳楨總河之名始于永樂之用陳瑄明之總督提督皆御史差也差畢回院乃自部卿藩臬陞授蓋

